

Na osnovu člana 22 Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta Bosne i Hercegovine, na 52. redovnoj sjednici održanoj 12. oktobra 2011. godine, usvaja

ZAKON
O IZVRŠENJU KRIVIČNIH SANKCIJA, PRITVORA I DRUGIH MJERA U BRČKO
DISTRIKTU BOSNE I HERCEGOVINE

I - OSNOVNE ODREDBE

Član 1

(Predmet i primjena ovog zakona)

(1) Ovim zakonom propisuje se izvršenje krivičnih sankcija, pritvora i drugih mjera koje su izrekli Osnovni sud Brčko distrikta BiH (u daljnjem tekstu: Osnovni sud) i Apelacioni sud Brčko distrikta BiH (u daljnjem tekstu: Apelacioni sud).

(2) Prema odredbama ovog zakona izvršavat će se i krivične sankcije inostranih sudova kada je to predviđeno odredbama zakona Brčko distrikta BiH ili međunarodnim ugovorima.

(3) Prema odredbama ovog zakona izvršavaju se i krivične sankcije, pritvor i druge mjere koje je izrekao Osnovni sud i Apelacioni sud Distrikta stranim državljanima i licima bez državljanstva, osim ako posebnim zakonom Bosne i Hercegovine ili međunarodnim ugovorom, čiji je Bosna i Hercegovina potpisnik, nije drugačije određeno.

(4) Prema odredbama ovog zakona izvršit će se i sankcije izrečene od Suda BiH i sudova entiteta za djela predviđena krivičnim zakonodavstvom u Bosni i Hercegovini.

Član 2

(Definicije pojmova)

Osim ako ovim zakonom nije drugačije određeno, pojedini izrazi upotrijebljeni u ovom zakonu imaju sljedeće značenje:

a) "pritvorenik" je lice kome je u skladu s odredbama Zakona o krivičnom postupku određena mjera pritvora;

b) "osuđeni" je lice za koje je pravosnažnom odlukom utvrđeno da je krivično odgovorno za određeno krivično djelo;

- c) "zatvorenik" je lice koje je pravosnažnom odlukom proglašeno krivično odgovornim za određeno krivično djelo i koje u zavodu služi zatvorsku kaznu iz pravosnažne odluke, u skladu s odredbama ovog zakona;
- d) "zavod" je kazneno-popravni zavod ili vaspitno-popravni dom entiteta u kojima se izvršavaju kazne zatvora, mjere pritvora ili odgojne mjere.
- e) "organ socijalne zaštite" je centar za socijalni rad ili druga ustanova koja se bavi poslovima socijalne zaštite.
- f) "oštećena strana" je lice čija su lična ili imovinska prava ugrožena ili povrijeđena počinjenim krivičnim djelom;
- g) "pravno lice" su sva lica koja su kao takva definisana u Zakonu o krivičnom postupku Brčko distrikta BiH, uključujući korporacije, preduzeća, udruženja, firme i partnerstva i druga privredna društva;
- h) "tužilac" je svaki tužilac Tužilaštva Brčko distrikta BiH;
- i) "Sud" je Osnovni sud Brčko distrikta BiH;
- j) "Zakon o krivičnom postupku" je Zakon o krivičnom postupku Brčko distrikta BiH;
- k) "Krivični zakon" je Krivični zakon Brčko distrikta BiH;
- l) "ministarstva pravde" su Ministarstvo pravde Republike Srpske i Federalno ministarstvo pravde;
- lj) "entiteti" su Republika Srpska i Federacija Bosne i Hercegovine;
- m) "Pravosudna komisija" je Pravosudna komisija Brčko distrikta BiH.

Član 3

(Ostvarivanje prava)

(1) Lica prema kojima se izvršavaju krivične sankcije, pritvor i druge mjere zadržavaju sva prava, a lišavaju se prava ili se ograničavaju u pravima samo u granicama neophodnim za ostvarivanje cilja zbog kojeg su izrečene, a u skladu sa zakonom i međunarodnim ugovorom.

(2) Osuđena lica koja na izdržavanje kazne upućuje Sud izdržavaju kaznu prema svom izboru u ustanovama za izvršenje kazne zatvora, odnosno ustanovama za izvršenje zavodskih vaspitnih mjera Federacije BiH, odnosno Republike Srpske, u skladu sa njihovim zakonima.

(3) Mjera pritvora određena rješenjem Suda izvršava se u posebnom pritvorskom odjeljenju zavoda ili u posebnim zavodima za mjere pritvora u entitetima.

(4) Pritvorska odjeljenja su zatvorenog tipa.

(5) Osuđena lica koja izdržavaju kazne zatvora, dugotrajnog zatvora, mjere pritvora, mjere bezbjednosti ili vaspitne mjere u odgovarajućim ustanovama entiteta imaju iste uslove i prava kao i ostala lica koja izdržavaju kazne, mjere pritvora i mjere bezbjednosti ili vaspitne mjere u tim ustanovama, tako da se i na njih primjenjuju odredbe odgovarajućih zakona entiteta o izvršenju krivičnih sankcija i to: o smještaju i higijenskim uslovima, o odijevanju i ishrani, o zdravstvenoj zaštiti, o ograničenju kretanja i pravu na kontakte, o radu i naknadi za rad, o pravima i pogodnostima, o disciplinskoj odgovornosti, o kućnom redu u ustanovama kao i ostale odredbe kojima se uređuje rad i funkcionisanje u ustanovama za izvršenje kazni, mjera bezbjednosti i vaspitnih mjera.

(6) Neće biti nametnuto nijedno ograničenje koje nije predviđeno zakonom, nije neophodno za ostvarenje cilja za koji je namijenjeno, nije efikasno u ostvarivanju tog cilja i nije proporcionalno.

(7) Ministarstva pravde dužna su osigurati pristup i povjerljivu komunikaciju pritvorenika i zatvorenika s domaćim i međunarodnim organizacijama i drugim institucijama nadležnim za praćenje i ostvarivanje ljudskih prava i osnovnih sloboda u skladu sa zakonom i odgovarajućim međunarodnim dokumentima. Zavod će omogućiti da se ova komunikacija ostvaruje bez neosnovanog ometanja.

Član 4

(Početak izvršenja)

(1) Izvršenju krivične sankcije, pritvora i drugih mjera pristupa se kad postane pravosnažna odluka kojom su one izrečene, te ako za to nema zakonskih smetnji.

(2) Sa izvršenjem krivične sankcije ili druge mjere može se otpočeti i prije nego što je postala pravosnažna odluka kojom je sankcija ili mjera izrečena samo ako je to zakonom posebno predviđeno.

Član 5

(Radnje za provođenje izvršenja)

(1) Kada su ispunjeni uslovi da se pristupi izvršenju krivične sankcije, pritvora ili druge mjere, Sud je obavezan preduzeti potrebne radnje da se izvršenje sankcije provede bez odlaganja u skladu s ovim zakonom.

(2) Izvršenje može biti odgođeno samo u slučajevima i pod uslovima predviđenim zakonom.

Član 6

(Troškovi izvršenja i plaćanje takse)

(1) Lice prema kojem se primjenjuje krivična sankcija, mjera pritvora ili druga mjera ne plaća troškove izvršenja, osim troškova novčane kazne, kao i drugih troškova, u skladu sa zakonom.

(2) Za podneske, službene radnje, rješenja i druge akte u vezi s izvršenjem sankcija ne plaća se taksa.

Član 7

(Stručni savjet)

Radi praćenja, proučavanja i unapređenja sistema izvršenja sankcija, ministri pravde osnovat će stručni savjet iz reda predstavnika naučnih ustanova, sudova, Pravosudne komisije, organa uprave, stručnih udruženja, građanskog društva i drugih institucija koje se bave pitanjima kriminaliteta i odgoja osuđenih lica.

Član 8

(Poslovi izvršenja kao poslovi od posebnog interesa za Brčko distrikt BiH)

Poslovi izvršenja krivičnih sankcija, pritvora i drugih mjera propisani ovim zakonom su poslovi od posebnog interesa za Brčko distrikt BiH.

II - ORGANI ZA IZVRŠENJE KRIVIČNIH SANKCIJA, PRITVORA I DRUGIH MJERA

1. Vodeći organi i saradnja

Član 9

(Ministarstva pravde i Zavodi)

Ministarstva pravde i Zavodi za izvršenje krivičnih sankcija, pritvora i drugih mjera u Bosni i Hercegovini i entitetima, odgovorni su za izvršenje krivičnih sankcija, pritvora i drugih mjera, u skladu sa sporazumima.

Član 10

(Saradnja organa)

Organi vlasti, ustanove i druga pravna lica u čiji djelokrug spada primjena zdravstvenih, socijalnih, odgojnih ili drugih mjera od značaja za izvršenje krivičnih sankcija, pritvora i drugih mjera, obavezni su saradivati s Pravosudnim institucijama Brčko distrikta BiH i Ministarstvima pravde. Obaveza saradnje odnosi se i na pomoć koja se pruža licima na uslovnom otpustu.

III - ODREDBE O UPUĆIVANJU NA IZDRŽAVANJE PRITVORA ILI KAZNE ZATVORA

Član 11

(Nadležnost za upućivanje)

- (1) Upućivanje osuđenih lica na izdržavanje kazne zatvora vrši Sud ako osuđena lica imaju prebivalište ili boravište na teritoriji Brčko distrikta BiH.
- (2) Osuđenog koji je u pritvoru na izdržavanje kazne zatvora upućuje Sud.
- (3) Ako je mjesto prebivališta odnosno boravišta osuđenog nepoznato, nadležan je za upućivanje sud koji je donio prvostepenu presudu.
- (4) Sud je dužan preduzeti potrebne radnje radi izvršenja mjere pritvora i kazne zatvora bez odlaganja.

IV - ODREDBE O IZVRŠENJU PRITVORA

Član 12

(Opće odredbe)

Pritvor se izvršava u ustanovama koje za tu namjenu odredi Pravosudna komisija u saradnji s nadležnim organima entiteta. Na poslovima izvršavanja pritvora mogu da rade samo oni zaposleni koji imaju potrebna znanja i vještine i stručnu spremu predviđenu propisima.

Član 13

(Zavod ili odjeljenja zavoda za pritvor)

- (1) Mjera pritvora određena rješenjem Suda izvršava se u posebnom pritvorskom odjeljenju zavoda ili u posebnom zavodu za mjeru pritvora, u jednom od entiteta.
- (2) Pritvorska odjeljenja su zatvorenog tipa.

Član 14

(Postupanje s pritvorenima)

- (1) U postupanju s pritvorenim licima primjenjuju se odgovarajuće odredbe Zakona o krivičnom postupku, kao i odredbe ovog zakona.
- (2) Na zahtjev tužioca i ako je to u interesu pravde, Sud može narediti da se ograniče određena prava pritvorenika.

Član 15

(Premještaj pritvorenika)

- (1) Ako je u interesu vođenja krivičnog postupka ili ako to zahtijevaju sigurnosni razlozi, pritvorenik se može premjestiti iz jednog u drugi zavod ili na liječenje iz jedne zdravstvene ustanove u drugu zdravstvenu ustanovu bilo kojeg od entiteta.
- (2) Rješenje o premještaju pritvorenika iz stava 1 ovog člana donosi Sud.
- (3) Protiv rješenja iz stava 2 ovog člana pritvorenik može izjaviti žalbu vijeću Suda u roku od tri dana od dana prijema rješenja.
- (4) Žalba ne odgađa izvršenje rješenja.
- (5) Rješenje vijeća Suda je konačno.
- (6) Prilikom premještanja iz jedne u drugu ustanovu, lice iz stava 1 ovog člana mora biti što manje izloženo javnosti i zaštićeno odgovarajućim mjerama od uvreda, znatiželje i publiciteta u bilo kojem obliku.
- (7) Troškove premještaja snosi zavod.

Član 16

(Smještaj u zdravstvenu ustanovu zbog psihičkih smetnji)

- (1) Pritvorenik koji za vrijeme izdržavanja mjere pritvora duševno oboli ili pokazuje teške psihičke smetnje, smjestit će se u zdravstvenu ustanovu.
- (2) O smještaju u smislu stava 1 ovog člana odlučuje Sud, na prijedlog upravnika zavoda, a na osnovu obrazloženog mišljenja dva ljekara, od kojih je jedan psihijatar.
- (3) Pritvorenik ostaje u zdravstvenoj ustanovi dok ne prestanu razlozi za smještaj, a najduže do isteka vremena pritvora, osim ako je u skladu s odredbama odgovarajućeg zakona doneseno neko drugo rješenje.

Član 17

(Otpuštanje iz pritvora)

Otpuštanje pritvorenog lica iz zavoda vrši se na osnovu rješenja o ukidanju pritvora ili istekom vremena za koje je pritvor određen.

Član 18

(Obavještenje o smrti pritvorenika)

U slučaju smrti pritvorenog lica, o tome će se bez odgađanja obavijestiti uža porodica, ukoliko je ima, i Sud.

Član 19

(Nadzor nad izvršenjem mjere pritvora)

Nadzor nad izvršenjem mjere pritvora vrši Ministarstvo pravde nadležnog Entiteta na čijoj teritoriji se nalazi zavod i Sud.

V - ODREDBE O IZVRŠENJU KAZNE ZATVORA

1. Opće odredbe

Član 20

(Cilj kazne zatvora)

Cilj izvršenja kazne zatvora je da se kazne počinioci krivičnih djela kako je to odredio Sud, te da se zatvorenicima omogući da tokom izdržavanja kazne, kroz sistem savremenih odgojnih mjera, usvoje društveno prihvatljive vrijednosti s ciljem lakšeg uključivanja u uslove života na slobodi i da se ponašaju u skladu sa zakonom i ispunjavaju dužnosti građanina.

Član 21

(Opća odredba o uslovnom otpustu)

Radi podsticanja vlastitih napora zatvorenika za uključivanje u redovan život na slobodi, zatvorenici za koje se osnovano može očekivati da će se na slobodi dobro vladati i da neće vršiti krivična djela mogu se pustiti na uslovni otpust, u skladu s krivičnim zakonom.

Član 22

(Pomoć nakon otpusta)

(1) Zatvorenicima otpuštenim sa izdržavanja kazne zatvora nadležni organi, ustanove i druga pravna lica pružat će potrebnu pomoć za njihovo lakše i brže uključivanje u redovan život na slobodi.

(2) Pomoć iz stava 1 podrazumijeva, ali ne i ograničava na, iznalaženje privremenog smještaja i osiguranje ishrane, neophodno liječenje, iznalaženje nove sredine u kojoj će osuđeno lice živjeti, pomoć u sređivanju porodičnih prilika, u pronalaženju zaposlenja i završetak započetog stručnog osposobljavanja i davanje novčane pomoći za podmirivanje najnužnijih potreba.

2. Upućivanje na izdržavanje kazne zatvora

Član 23

(Zavodi i institucije za izdržavanje kazne zatvora)

Kazna zatvora izvršavat će se u Zavodima za izvršenje krivičnih sankcija entiteta ili u drugim institucijama koje su propisima entiteta utvrđene kao najpogodnije za ostvarenje svrhe kazne zatvora.

Član 24

(Oduzimanje putne isprave)

(1) S ciljem osiguranja izvršenja kazne zatvora, Sud vrši upućivanje osuđenog lica, a ukoliko ocijeni da bi to lice, odlaskom u inostranstvo moglo osujetiti izvršenje kazne, tražit će od nadležnog organa da mu oduzme isprave koje se mogu koristiti za prelazak državne granice do izvršenja kazne.

(2) O oduzimanju i zadržavanju isprave koja se može koristiti za prelazak državne granice izdaje se potvrda.

Član 25

(Izvršenje rješenja o upućivanju)

(1) Sud poziva osuđeno lice koje se nalazi na slobodi i saopštava mu dan kada treba da se javi radi izdržavanja kazne zatvora.

(2) Dan javljanja u zavod određuje se tako da osuđenom licu ostane najmanje osam, a najviše 15 dana do dana javljanja na izdržavanje kazne zatvora.

(3) Pri saopštenju predaje se osuđenom licu uputni akt, kao i vozna karta ako za odlazak treba koristiti prevozna sredstva javnog saobraćaja.

(4) Sud je dužan da prilikom upućivanja osuđenog lica na izdržavanje kazne zatvora, istovremeno ili najkasnije u roku od tri dana o tome obavijesti zavod.

(5) Uz uputni akt obavezno se dostavlja prijepis presude i izvod iz kaznene evidencije.

(6) Za lica koja se upućuju na izdržavanje kazne prije pravosnažnosti presude, Sud je dužan, uz rješenje o upućivanju na izdržavanje kazne zatvora, zavodu dostaviti i prepis nepravosnažne presude.

(7) Zavod je dužan da što je prije moguće, ali najkasnije u toku istog dana obavijesti Sud o stupanju osuđenog lica na izdržavanje kazne zatvora.

(8) Ako se osuđeno lice, koje je na slobodi, ne javi određenog dana radi izdržavanja kazne zatvora, zavod će o tome obavijestiti Sud što je prije moguće, ali najkasnije u toku istog dana.

(9) Ako se uredno upućeno osuđeno lice ne javi u zavod u određenom roku, Sud će izdati naredbu sudskoj policiji da se to lice prinudno sprovede.

(10) Za osuđena lica koja se kriju ili se nalaze u bjekstvu, Sud donosi naredbu za izdavanje potjernice koju dostavlja nadležnom policijskom organu.

(11) Kada osuđeno lice bude lišeno slobode sprovodi se u zavod.

(12) Troškove sprovođenja u slučaju iz st. 9 i 10 ovog člana snosi osuđeno lice.

Član 26

(Početak i računanje kazne zatvora)

(1) Početak izvršenja kazne zatvora računa se od dana kada se osuđeno lice samo javi radi izdržavanja kazne zatvora, odnosno od dana kada bude sprovedeno u zavod.

(2) Ako osuđeno lice pobjegne s izdržavanja kazne, vrijeme provedeno u bjekstvu ne računa se u izdržanu kaznu.

(3) Rukovodilac ustanove u kojoj se osuđeni nalazio na izdržavanju kazne dužan je u slučaju iz stava 2 ovog člana izdati naredbu za raspisivanje potjernice za osuđenim licem radi pronalaženja i vraćanja osuđenog u ustanovu.

Član 27

(Nadzor nad radom sudske uprave)

Nadzor nad radom sudske uprave u vršenju poslova upućivanja osuđenih lica na izdržavanje kazne zatvora vrši Pravosudna komisija.

3. Odgađanje izvršenja kazne

Član 28

(Razlozi odgađanja izvršenja kazne)

(1) Osuđenom licu koje se nalazi na slobodi može se, na njegovu molbu ili s njegovim pristankom, na molbu članova uže porodice ili na prijedlog nadležnog općinskog organa socijalne zaštite, odgoditi izvršenje kazne zatvora ako:

1. je oboljelo od teže akutne bolesti;
2. se desio smrtni slučaj ili teška bolest u užoj porodici osuđenog lica;
3. je odgađanje potrebno radi izvršenja ili dovršenja izuzetno neodgodivih poljskih ili sezonskih radova ili radova izazvanih elementarnim nepogodama ili drugim udesom, a porodica osuđenog lica nema drugih članova porodice sposobnih za rad, niti se zbog slabog imovnog stanja ili iz drugih opravdanih razloga može angažirati drugo lice za obavljanje ovih poslova;
4. je osuđeno lice obavezno izvršiti određeni posao koji je već započelo, a usljed neizvršenja posla nastala bi neotklonjiva ili znatnija šteta, za njega ili njegovu užu porodicu, odnosno za lice, odnosno organizaciju prema kojoj je u obavezi;
5. je odgađanje osuđenom licu potrebno zbog završetka školovanja ili polaganja ispita za koji se pripremalo;
6. je zajedno s osuđenim licem osuđen njegov bračni drug ili drugi članovi zajedničkog domaćinstva ili ako se oni već nalaze na izdržavanju kazne zatvora, a istovremenim izdržavanjem kazne svih tih lica bilo bi ugroženo izdržavanje maloljetnih, bolesnih ili starih članova domaćinstva;
7. je osuđeno lice žena koja doji dijete mlađe od godinu dana ili koja je trudna;
8. je osuđeno lice jedini hranilac porodice, a stupanjem na izdržavanje kazne zatvora bilo bi ugroženo izdržavanje porodičnog domaćinstva.
9. je podnesena molba za pomilovanje.

(2) Izvršenje kazne u slučaju iz tačke 1 stava 1 ovog člana može se odgoditi za vrijeme dok bolest traje, u slučajevima iz tač. 2, 3 i 4 najduže tri mjeseca, u slučajevima iz tač. 5, 6 i 8 najduže šest mjeseci, u slučajevima iz tačke 7 do navršene jedne godine života djeteta, a u slučaju iz tačke 9 do donošenja odluke o pomilovanju.

(3) U slučaju iz tačke 1 stava 1 ovog člana, osuđeno lice dužno je svaka tri mjeseca sudu podnositi dokaz o svom zdravstvenom stanju.

Član 29

(Molba za odgađanje)

(1) Molba za odgađanje izvršenja kazne zatvora podnosi se u roku od tri dana od dana uručenog uputnog akta iz stava 3 člana 25 ovog zakona.

- (2) Ako je razlog za odgađanje izvršenja kazne zatvora iz stava 1 tačke 1 člana 28 ovog zakona nastao nakon tog roka, molba se može podnijeti do dana kada osuđeno lice treba da se javi radi izdržavanja kazne.
- (3) U molbi se moraju navesti razlozi i dokazi o činjenicama koje opravdavaju odgađanje.
- (4) Dokaze o činjenicama iz tač. 1, 2, 5, 6 i 7 stava 1 člana 28 ovog zakona izdaje nadležni organ, a iz tač. 3, 4 i 8 mjesna zajednica prema prebivalištu osuđenog lica.
- (5) O molbi za odgađanje izvršenja kazne zatvora odlučuje predsjednik Suda koji je dužan donijeti rješenje u roku od pet dana od dana prijema molbe.
- (6) Prije donošenja rješenja Sud može izvršiti potrebne provjere radi utvrđivanja činjenica navedenih u molbi.
- (7) Molbu koja nije podnesena u roku i molbu u kojoj nisu navedeni razlozi, dokazi i činjenice, predsjednik Suda će rješenjem odbaciti.
- (8) Izvršenje kazne neće se odgoditi ako bi zbog odgađanja nastupila zastara izvršenja kazne.
- (9) Ukupno odgađanje izvršenja kazne po svim osnovama može trajati najduže 12 mjeseci, osim u slučaju iz tačke 7 stava 1 člana 28 ovog zakona.
- (10) Do donošenja rješenja o molbi odgađa se početak izvršenja kazne zatvora.

Član 30

(Žalba)

- (1) Protiv rješenja kojim se odbija ili odbacuje molba za odgađanje izvršenja kazne zatvora osuđeno lice ima pravo žalbe u roku od tri dana od dana prijema rješenja predsjedniku Apelacionog suda.
- (2) Žalba odgađa izvršenje kazne.
- (3) Predsjednik Apelacionog suda dužan je donijeti rješenje po žalbi iz stava 1 ovog člana u roku od tri dana od dana prijema žalbe, a u roku od pet dana od dana donesenog rješenja dužan je dostaviti ga Sudu.
- (4) Protiv rješenja predsjednika Apelacionog suda ne može se pokrenuti upravni spor.
- (5) O odgađanju izvršenja kazne zatvora Sud će obavezno obavijestiti zavod.

Član 31

(Odgađanje izvršenja na zahtjev tužioca)

(1) Kad tužilac na osnovu zakonskog ovlaštenja zatraži odgađanje izvršenja kazne zatvora, Sud neće pozivati osuđeno lice radi izvršenja kazne, a ako ga je već pozvao, ali još nije prošao rok javljanja u zavod, donijet će rješenje o odgađanju izvršenja kazne zatvora.

(2) Odgađanje izvršenja kazne zatvora u slučaju iz stava 1 ovog člana traje dok tužilac ne obavijesti Sud da se može početi sa izvršenjem kazne zatvora, odnosno dok ne bude donesena odluka o pravnom sredstvu tužioca.

Član 32

(Obavještavanje organa socijalnog staranja)

Ako osuđeno lice koje se upućuje na izdržavanje kazne zatvora ima maloljetnu djecu ili druga lica o kojima se isključivo stara, Sud će o tome obavijestiti nadležni organ socijalnog staranja Distrikta.

4. Prekid izdržavanja kazne zatvora

Član 33

(Ovlaštenje za prekid izdržavanja)

(1) Zatvoreniku se može dozvoliti prekid izdržavanja kazne zatvora.

(2) Odredbe čl. 28, 29, 30 i 31 ovog zakona shodno se primjenjuju i u slučaju prekida izdržavanja kazne zatvora.

(3) Prekid izdržavanja kazne zatvora izvršit će se i u slučaju kada se zatvoreniku odredi mjera pritvora za drugo krivično djelo.

(4) O prekidu izdržavanja kazne zatvora rješenjem odlučuje predsjednik Suda.

Član 34

(Podnošenje molbe)

Molba zatvorenika za prekid izdržavanja kazne zatvora i mišljenje zavoda dostavljaju se predsjedniku Suda u roku od tri dana od dana predaje molbe upravi zavoda.

Član 35

(Žalba protiv rješenja Suda)

(1) Protiv rješenja iz stava 4 člana 33 ovog zakona zatvorenik može izjaviti žalbu predsjedniku Apelacionog suda u roku od tri dana od dana prijema rješenja.

(2) Protiv rješenja predsjednika Apelacionog suda ne može se pokrenuti upravni spor.

(3) Vrijeme provedeno na prekidu izdržavanja kazne zatvora, odobrenom od Suda, ne računa se u vrijeme izdržavanja kazne zatvora.

Član 36

(Stavljanje van snage rješenja o prekidu)

(1) Ako se za vrijeme trajanja prekida izdržavanja kazne zatvora utvrdi da su prestale okolnosti zbog kojih je prekid dozvoljen, ili je prekid dozvoljen na osnovu lažnih isprava ili drugih dokaza, odnosno da se prekid ne koristi s ciljem s kojim je dozvoljen, rješenje iz čl. 33 ili 35 ovog zakona stavit će se van snage, a zatvoreniku naložiti da se javi na daljnje izdržavanje kazne zatvora odmah, a najkasnije u roku od tri dana od dana prijema rješenja.

(2) Rješenje iz stava 1 ovog člana dostavlja se zavodu i zatvoreniku.

(3) Na rješenje iz stava 2 ovog člana zatvorenik ima pravo žalbe u roku od tri dana. Žalba ne odgađa izvršenje.

(4) Ako se zatvorenik ne javi na daljnje izdržavanje kazne zatvora u roku određenom u rješenju, zavod će postupiti po odredbama iz st. od 8 do 11 člana 25 ovog zakona.

5. Premještaj tokom izdržavanja kazne

Član 37

(Podnošenje molbe i odluka o premještaju)

(1) Nakon izdržane jedne polovine kazne zatvora, na molbu osuđenog lica ili na prijedlog rukovodioca ustanove može se odobriti premještaj osuđenog iz jedne u drugu ustanovu.

(2) O premještaju zatvorenika odlučuje predsjednik Pravosudne komisije uz pribavljeno mišljenje ustanove.

(3) Ako je molba podnesena prije roka iz stava 1 ovog člana, odbacit će se kao preuranjena.

(4) Ako je molba odbijena, nova molba može se podnijeti po proteku šest mjeseci od dana pravosnažnosti rješenja.

(5) Protiv rješenja iz stava 2 ovoga člana može se uložiti žalba Pravosudnoj komisiji u roku od tri dana.

Član 38

(Žalbe)

- (1) Žalba na rješenje kojim se dozvoljava premještaj ne zadržava izvršenje rješenja.
- (2) Protiv rješenja donesenog po žalbi iz stava 5 člana 37 ne može se pokrenuti upravni spor.

6. Otpust

a) Uslovni otpust

Član 39

(Cilj uslovnog otpusta)

Kako bi se zatvorenici podstakli da razriješe probleme i situacije koje bi mogle dovesti do činjenja krivičnog djela, uspostavlja se sistem uslovnog otpusta, na osnovu kojeg se može uslovno otpustiti zatvorenik za kojeg se procijeni da više ne predstavlja neprihvatljiv rizik za zajednicu.

Član 40

(Komisija za uslovni otpust)

- (1) O uslovnom otpustu zatvorenika kojima je kaznu zatvora izrekao Sud, odlučuje Komisija za uslovni otpust (u daljnjem tekstu: Komisija). Komisiju imenuje gradonačelnik Brčko distrikta BiH.
- (2) Komisija ima pet članova, od kojih je jedan predsjednik. Kvorum za donošenje odluka čine tri člana.
- (3) Komisija se sastoji od po jednog predstavnika Apelacionog suda i Osnovnog suda, Tužilaštva, Kancelarije za pravnu pomoć i Pravosudne komisije.
- (4) Članovi Komisije imenuju se na period od pet godina, s mogućnošću ponovnog izbora na još jedan mandat.
- (5) U slučaju prestanka mandata nekog od članova Komisije, mandat njegovog zamjenika trajat će do isteka tekućeg mandata Komisije.
- (6) Ovo imenovanje neće biti smetnja za ponovno imenovanje za člana Komisije u pogledu broja mandata, ako je preostalo vrijeme mandata Komisije kraće od dvije godine.

- (7) Komisija je u svom radu nezavisna
- (8) Komisija donosi Poslovnik o radu.

Član 41

(Prestanak mandata članova Komisije)

- (1) Članovi mogu dati ostavku u bilo kom momentu, a mogu biti razriješeni dužnosti isključivo radi utvrđenog kršenja dužnosti, počinjenog krivičnog djela, ili iz drugih ozbiljnih razloga, utvrđenih u postupku.
- (2) Rješenje o razrješenju predsjednika ili bilo kojeg člana Komisije, ako se dokaže da postoji osnov za razrješenje, donosi gradonačelnik Brčko distrikta BiH.

Član 42

(Informacije koje se dostavljaju Komisiji)

- (1) O uslovnom otpustu Komisija rješava na osnovu molbe zatvorenika, člana njegove uže porodice ili na prijedlog upravnika zavoda.
- (2) Molbe, odnosno prijedlozi, dostavljaju se Komisiji putem zavoda.
- (3) Zavodi uz molbu dostavljaju podatke o postignutom uspjehu u programu tretmana zatvorenika, podatke o eventualnim ranijim osudama, opis krivičnog djela, podatke o ponašanju zatvorenika, kao i ostale izvještaje drugih stručnih lica koja su angažirana u radu sa zatvorenikom, te druge podatke značajne za odluku. Uz molbu zatvorenika prilaže se i mišljenje zavoda o osnovanosti molbe, odnosno prijedloga.
- (4) Pri donošenju odluke o uslovnom otpustu Komisija se mora ograničiti na sljedeće kriterije:
 1. ranija osuđivanost;
 2. ponašanje u zavodu;
 3. učešće u programu tretmana;
 4. stav prema žrtvi;
 5. rizik ponovnog činjenja krivičnih djela;
 6. adekvatnost prijedloga za izmještanje.
- (5) Svi izvještaji koje zavod pripremi za Komisiju za uslovni otpust dostavljaju se i samom zatvoreniku, kojem se na taj način pruža prilika da Komisiji podnese pismene podneske u vezi s njihovim sadržajem.

Član 43

(Obavezni prijedlog upravnika za uslovni otpust)

(1) Upravnik zavoda obavezno upućuje Komisiji, po službenoj dužnosti, prijedloge za sve zatvorenike koji se mogu uzeti u razmatranje za uslovni otpust i to u roku od 30 dana prije datuma kada ističu dvije trećine od izrečene kazne i koji ispunjavaju predviđene zakonske uslove iz uslovnog otpusta.

(2) Prijedloge iz stava 1 ovog člana upravnik zavoda dostavljaće Komisiji, po sadržaju, obimu i proceduri, shodno članu 40 ovog zakona.

Član 44

(Dostavljanje rješenja Komisije)

(1) Uslovni otpust odobrava se ili odbija rješenjem. Rješenje mora biti obrazloženo.

(2) Rješenje Komisije o uslovnom otpustu dostavlja se zavodu, koji je dužan po jedan primjerak dostaviti zatvoreniku i Sudu.

(3) Ako je podnosilac molbe član porodice, o ishodu ga obavještava gradonačelnik Brčko distrikta BiH.

Član 45

(Stavljanje van snage rješenja o otpustu)

Ako u periodu nakon donošenja rješenja o uslovnom otpustu, a prije dana otpuštanja sa izdržavanja kazne zatvora na uslovni otpust zatvorenik učini disciplinski prekršaj, Komisija može rješenje staviti van snage.

Član 46

(Žalba i ponovno podnošenje molbe)

(1) Protiv odluke Komisije iz člana 43 ovog zakona ne može se izjaviti žalba, niti pokrenuti upravni spor.

(2) Zatvorenik ima pravo ponovnog podnošenja molbe za uslovni otpust nakon proteka jedne godine od posljednje odluke Komisije, ili i prije toga ako tako odluči Komisija u kojem slučaju će se ujedno odlučiti o zahtjevu - molbi za prijevremeno odobrenje za podnošenje molbe za uslovni otpust i o odobrenju uslovnog otpusta.

Član 47

(Godišnji izvještaj)

Godišnji izvještaj o svom radu Komisija dostavlja gradonačelniku Brčko distrikta BiH.

Član 48

(Nadležnost za rješavanje molbe za uslovni otpust zatvorenika osuđenog od Suda BiH ili entitetskih sudova)

U pogledu postupanja po molbi ili prijedlogu za rješavanje o uslovnom otpustu zatvorenika osuđenog od Suda BiH ili entitetskih sudova po osnovu zakona BiH i entiteta, primjenjivat će se odredbe Zakona o izvršenju krivičnih sankcija, pritvora i drugih mjera Bosne i Hercegovine.

Član 49

(Ovlaštenja upravnika zavoda u vezi s uslovnim otpustom)

(1) Zatvorenika koji ispoljava primjereno ponašanje, zalaže se na radu i aktivno učestvuje u procesu prevaspitavanja, a izdržao je najmanje 4/5 kazne zatvora, upravnik zavoda može uslovno pustiti na slobodu do tri mjeseca prije isteka kazne.

(2) Ova odredba o uslovnom otpustu ne primjenjuje se na lica kojima je novčana kazna zamijenjena kaznom zatvora.

VI - IZVRŠENJE NOVČANE KAZNE IZREČENE U KRIVIČNOM POSTUPKU

Član 50

(Odredbe Krivičnog zakona)

Novčana kazna izvršava se u skladu s relevantnim odredbama Krivičnog zakona.

VII - IZVRŠENJE MJERA ZAŠTITNOG NADZORA IZREČENIH UZ USLOVNU OSUDU

Član 51

(Cilj mjera zaštitnog nadzora)

Cilj izvršenja mjera zaštitnog nadzora iz člana 69 Krivičnog zakona jeste da se pružanjem pomoći, staranja, nadzora i zaštite za vrijeme trajanja uslovne osude pomogne društveno prilagođavanje osuđenog lica.

Član 52

(Zaštitni nadzor u mjestu prebivališta/boravišta)

Poslove izvršenja mjera zaštitnog nadzora obavlja organ socijalne zaštite prema prebivalištu, odnosno boravištu osuđenog lica.

Član 53

(Troškovi)

Troškove izvršenja mjera zaštitnog nadzora, ako zakonom nije drugačije određeno, snosi jedinica lokalne samouprave na čijem je području osuđeno lice imalo prebivalište, odnosno boravište u vrijeme određivanja ovih mjera.

Član 54

(Presuda i podaci koji se dostavljaju organu socijalne zaštite)

Sud je, uz pravosnažnu presudu, nadležnom organu socijalne zaštite dužan dostaviti i sve važnije podatke o ličnosti osuđenog lica koje je pribavio u toku postupka, a naročito medicinsku dokumentaciju i nalaze i mišljenja sudskih vještaka.

Član 55

(Radnje koje preduzima organ socijalne zaštite)

(1) Nakon prijema pravosnažne presude, podataka i dokumentacije iz člana 52 ovog zakona, nadležni organ socijalne zaštite će, zavisno od vrste mjere zaštitnog nadzora, preduzeti potrebne radnje radi ostvarivanja saradnje s odgovarajućom zdravstvenom ustanovom, psihološkim savjetovalištem, odnosno zavodom za zapošljavanje, a po potrebi i s drugim ustanovama i organizacijama.

(2) Organ socijalne zaštite dužan je u roku od 15 dana od dana prijema izvršne presude, podataka i dokumentacije iz stava 1 ovog člana, osuđeno lice, kome je određena mjera zaštitnog nadzora, upoznati s radnjama koje je preduzeo, te ga poučiti o njegovim obavezama u toku trajanja mjere zaštitnog nadzora.

Član 56

(Upućivanje počinioca u odgovarajuću ustanovu)

Nadležni organ socijalne zaštite, zavisno od vrste mjere zaštitnog nadzora, uputit će osuđeno lice u odgovarajuću zdravstvenu ustanovu, psihološko savjetovalište, drugu ustanovu ili organizaciju i upoznati ga da je dužan postupati u skladu s dobijenim savjetima i uputstvima, kao i posjećivati organ socijalne zaštite Distrikta prema njegovim uputstvima.

Član 57

(Saradnja s porodicom počinioca)

Za vrijeme izvršenja mjera zaštitnog nadzora organ socijalne zaštite ostvarivat će potrebnu saradnju i s porodicom osuđenog lica s ciljem sređivanja njegovih porodičnih prilika.

Član 58

(Informacije o rezultatima)

- (1) Nadležni organ socijalne zaštite Distrikta dužan je najmanje jednom u šest mjeseci, odnosno kad to Sud zatraži, dati informaciju o rezultatu izvršenja mjere zaštitnog nadzora.
- (2) Ako osuđeno lice ne prihvati ili odbije izvršenje mjere zaštitnog nadzora, organ socijalne zaštite dužan je o tome obavijestiti Sud.
- (3) Kad organ socijalne zaštite u toku izvršenja mjere zaštitnog nadzora ocijeni da je ispunjen cilj mjere, dužan je o tome obavijestiti Sud.

VIII - IZVRŠAVANJE RADA ZA OPĆE DOBRO NA SLOBODI

Član 59

(Opće odredbe o izvršavanju rada za opće dobro na slobodi)

- (1) Organi Distrikta, organizacije, ustanove i druga pravna lica, kao i fizička lica, dužna su sarađivati s Pravosudnom komisijom u izvršavanju rada za opće dobro na slobodi na zahtjev komisije.
- (2) Pravosudna komisija sklapa ugovore za izvršavanje rada za opće dobro iz stava 1 ovog člana.
- (3) Ugovorima se utvrđuju međusobna prava i obaveze.
- (4) Na radno-pravna pitanja kao što su radno vrijeme, dnevni i sedmični odmori, te upotrebu sredstava zaštite na radu primjenjuju se opći propisi o radu i radnim odnosima.
- (5) Rad za opće dobro na slobodi je besplatan i ne služi postizanju dobiti.
- (6) Osuđeno lice ne snosi troškove izvršavanja rada za opće dobro.
- (7) Rad za opće dobro na slobodi izvršava se, u pravilu, u mjestu prebivališta, odnosno boravišta osuđenog lica.

Član 60

(Raspored na rad za opće dobro)

- (1) Pravosudna komisija donijet će rješenje o mjestu rada osuđenog lica u roku od osam dana od prijema pravosnažne presude.
- (2) Osuđeno lice će se, zavisno od raspoloživih mogućnosti, rasporediti na rad u skladu sa zdravstvenim sposobnostima, stručnom osposobljenošću i stečenim znanjima.

(3) Osuđeno lice raspoređuje se na rad na raspoloživo mjesto u skladu s Pravilnikom o vrsti i uslovima rada za opće dobro, koji donosi Pravosudna komisija.

(4) Početak i raspored izvršavanja rada za opće dobro utvrđuje posebnim rješenjem Pravosudna komisija.

IX - IZVRŠENJE MJERA SIGURNOSTI

1. Obavezno psihijatrijsko liječenje

Član 61

(Mjesto izvršenja mjere obaveznog psihijatrijskog liječenja)

(1) Mjera sigurnosti obaveznog psihijatrijskog liječenja koja se izriče uz kaznu zatvora izvršava se u zavodu u skladu s pravilnikom koji donosi ministar pravde entiteta.

(2) Mjera sigurnosti obaveznog psihijatrijskog liječenja koja se izriče uz rad za opće dobro na slobodi izvršava se u psihijatrijskom odjeljenju opće zdravstvene ustanove u skladu sa zakonima o izvršenju krivičnih sankcija, pritvora i drugih mjera entiteta na čijoj teritoriji se nalazi zdravstvena ustanova.

(3) Troškove izvršenja mjere sigurnosti obaveznog psihijatrijskog liječenja snosi Pravosudna komisija.

2. Obavezno liječenje od ovisnosti

Član 62

(Mjesto izvršenja mjere obaveznog liječenja od ovisnosti)

(1) Mjera sigurnosti obaveznog liječenja od ovisnosti, izrečena uz безусловnu kaznu zatvora, izvršava se u zavodu u skladu s pravilnikom koji donosi ministar pravde entiteta.

(2) Mjera sigurnosti obaveznog liječenja od ovisnosti, izrečena uz uslovnu osudu ili uz rad za opće dobro na slobodi, izvršava se u skladu sa Zakonom o izvršenju krivičnih sankcija, pritvora i drugih mjera entiteta na čijoj teritoriji se nalazi zdravstvena ustanova.

(3) U slučaju opozivanja uslovne osude, izvršenje mjere sigurnosti obaveznog liječenja od ovisnosti bit će provedeno u skladu s odredbama st. 1 ovog člana.

3. Zabrana vršenja poziva, djelatnosti ili dužnosti

Član 63

(Izvršenje zabrane)

(1) Mjeru sigurnosti zabrane vršenja poziva, djelatnosti ili dužnosti izvršava nadležni organ unutrašnjih poslova za područje općine, odnosno organ uprave nadležan za izdavanje dozvole, odnosno odobrenja za vršenje određenog poziva, djelatnosti ili dužnosti.

(2) Sud obavještava o izricanju mjere nadležni organ unutrašnjih poslova za područje općine na čijem području lice prema kojem je mjera sigurnosti izrečena ima prebivalište, odnosno boravište.

(3) Odluka o izrečenoj mjeri iz stava 1 ovog člana unosi se u kaznenu evidenciju.

(4) Ako se lice prema kojem je izrečena mjera iz stava 1 ovog člana preseli na područje druge općine, o tome će se obavijestiti nadležni općinski organ za unutrašnje poslove te općine, radi unošenja odluke u kaznenu evidenciju.

(5) Ako je vršenje nekog poziva, djelatnosti ili dužnosti vezano za dozvolu nadležnog organa, Sud će dostaviti odluku o izrečenoj mjeri i tom organu.

(6) Ako se mjera odnosi na vršenje određenog poziva, djelatnosti ili dužnosti koje osuđeno lice obavlja u preduzeću, ustanovi ili državnom organu, Sud će odluku o izrečenoj mjeri dostaviti preduzeću, ustanovi ili državnom organu u kome je to lice zaposleno.

Član 64

(Način izvršenja)

(1) Ako vršenje nekog poziva, djelatnosti ili dužnosti nije vezano za posebnu dozvolu, odnosno odobrenje nadležnog organa, mjeru zabrane vršenja poziva, djelatnosti ili dužnosti izvršava nadležni općinski organ za unutrašnje poslove preduzimanjem potrebnih radnji kojima se licu prema kojem je ta mjera izrečena onemogućava da se bavi zabranjenim pozivom, djelatnošću ili drugim zanimanjem.

(2) Ako je vršenje nekog poziva, djelatnosti ili dužnosti na koje se zabrana odnosi vezano za dozvolu, odnosno odobrenje nadležnog organa, ova mjera sigurnosti izvršava se oduzimanjem dozvole, odnosno odobrenja, i zabranom njenog izdavanja sve dok je ta mjera sigurnosti na snazi, uz istovremeno unošenje te mjere u evidenciju tog organa.

4. Oduzimanje predmeta

Član 65

(Izvršenje mjere oduzimanja predmeta)

(1) Mjeru sigurnosti oduzimanja predmeta izvršava Sud, odnosno organ koji je donio odluku o primjeni ove mjere.

(2) Prema prirodi oduzetih predmeta odredit će se da li će se oduzeti predmeti prodati po propisima izvršnog postupka ili će se uništiti ili ustupiti određenom državnom organu ili organizaciji.

Član 66

(Prihodi)

Sredstva dobijena prodajom oduzetih predmeta prihodi su Budžeta Brčko distrikta BiH.

X - IZVRŠENJE MJERE ODUZIMANJA IMOVINSKE KORISTI STEČENE KRIVIČNIM DJELOM

Član 67

(Postupak)

(1) U pogledu nadležnosti i postupka za oduzimanje imovinske koristi važe odredbe Zakona o izvršnom postupku Brčko distrikta BiH, osim ako ovim zakonom nije drugačije određeno.

(2) Sud po službenoj dužnosti pokreće postupak za izvršenje odluke o oduzimanju imovinske koristi.

Član 68

(Oduzimanje imovinske koristi od pravnih lica)

Mjera oduzimanja imovinske koristi od preduzeća ili drugih pravnih lica, koja je izrečena u krivičnom postupku, vrši se po propisima o izvršenju zaštitne mjere oduzimanja imovinske koristi.

Član 69

(Preuzimanje kontrole nad imovinom od strane drugog pravnog lica)

Ako po pravosnažnosti odluke kojom se oduzima imovinska korist preduzeću ili drugom pravnom licu to preduzeće ili pravno lice prestane s radom ili izgubi svojstvo pravnog lica, postupak oduzimanja imovinske koristi provest će se protiv pravnog lica koje je preuzelo imovinu do visine vrijednosti preuzete imovine.

Član 70

(Prihodi budžeta Brčko distrikta BiH)

- (1) Oduzeta imovinska korist izražena u novcu, vrijednosnim papirima, kao i pokretnim i nepokretnim stvarima prihod je budžeta Brčko distrikta BiH i koristi se u skladu sa Zakonom o izvršenju budžeta.
- (2) Pokretne ili nepokretne stvari, kao i vrijednosni papiri prodat će se u skladu s važećim propisima.
- (3) Ukoliko se pokretne i nepokretne stvari ne mogu prodati u skladu s važećim propisima, mogu se dati na korištenje organizacijama iz socijalne politike, obrazovanja, državnim organima i sl.
- (4) Ako oštećenom bude naknadno priznat zahtjev za namirenje iz oduzete vrijednosti, Distrikt će oštećenom isplatiti utvrđeni iznos.

XI - IZVRŠENJE ODGOJNIH MJERA

Član 71

(Cilj izvršenja odgojnih mjera)

Cilj izvršenja odgojnih mjera je da se pružanjem zaštite, pomoći i nadzora maloljetnim počiniocima krivičnih djela u najvećoj mogućoj mjeri osigura njihovo odgajanje, popravlanje i pravilan razvoj, a kad je to potrebno, i da ih se spriječi u vršenju krivičnih djela.

Član 72

(Principi izvršenja odgojnih mjera)

- (1) U izvršenju odgojnih mjera s maloljetnicima treba postupati na način koji odgovara njihovom uzrastu i ličnim svojstvima, pridržavajući se u radu pedagoških, andragoških i psiholoških principa.
- (2) Maloljetnike treba podsticati da aktivno učestvuju u svom odgoju, mijenjanju svojih stavova i loših navika i u razvijanju osjećaja odgovornosti za vlastite postupke.
- (3) Tokom izvršenja odgojnih mjera maloljetnicima će se, u skladu s njihovim uzrastom i sposobnostima, kao i sklonostima prema određenim zanimanjima, osigurati osnovno i srednje obrazovanje, kao i radno osposobljavanje.

Član 73

(Izvršenje prije pravosnažnosti)

U krivičnom postupku protiv maloljetnika, Sud može odrediti da se s izvršenjem pojedinih odgojnih mjera može početi i prije pravosnažnosti sudske odluke, ako se smatra da je to za odgoj maloljetnika korisno i istovremeno potrebno radi odvajanja maloljetnika iz sredine u kojoj je živio, radi pružanja pomoći, zaštite ili smještaja maloljetnika, a kad taj smještaj nije moguće osigurati na drugi način, ili kad je to potrebno da ga se spriječi u vršenju krivičnih djela ili asocijalnog ponašanja.

Član 74

(Nadzor)

Nadzor nad izvršenjem odgojnih mjera vrši sudija koji je izrekao odgojnu mjeru.

Član 75

(Primjena odredbi koje se odnose na maloljetnike i na odrasla lica)

Odredbe ovog zakona koje se odnose na maloljetnike primjenjuju se i na lica koja su u toku primjene odgojnih mjera postala punoljetna, kao i na mlađa punoljetna lica kojima je Sud izrekao odgojnu mjeru.

XII - IZVRŠENJE KAZNI ZA PRAVNA LICA

Član 76

(Zakon o izvršnom postupku)

Izvršenje novčane kazne i kazne oduzimanja imovine za pravna lica vrši se na način propisan Zakonom o izvršnom postupku Brčko distrikta BiH.

Član 77

(Prestanak pravnog lica)

Na izvršenje kazne prestanka pravnog lica primjenjuju se pravila o likvidaciji i stečaju.

XIII - ZAVRŠNE ODREDBE

Član 78

(Shodna primjena drugih propisa)

Na sva pitanja koja nisu regulisana ovim zakonom, primjenjuju se odredbe Zakona o izvršenju krivičnih sankcija, pritvora i drugih mjera Bosne i Hercegovine.

Član 79

(Objavljivanje pravilnika)

(1) Pravilnici i drugi podzakonski akti predviđeni ovim zakonom donijet će se u roku od 60 dana od dana stupanja na snagu ovog zakona.

(2) Nakon donošenja, pravilnici predviđeni ovim zakonom objavljuju se u Službenom glasniku Brčko distrikta BiH.

Član 80

(Objavljivanje i stupanje na snagu zakona)

(1) Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

(2) Stupanjem na snagu ovog zakona prestaje da važi Zakon o izvršenju krivičnih i prekršajnih sankcija Brčko distrikta BiH (Službeni glasnik Brčko distrikta BiH, brojevi 8/00, 1/01, 19/07 i 36/07).

Broj: 01-02-463/11
Brčko, 12. oktobra 2011. godine

PREDSJEDNIK
SKUPŠTINE BRČKO DISTRIKTA BiH

Esad Atić, s.r.